

IDAHA OKU AARON YE CHRIST
Exodus 28:1-5; Leviticus 8:1-36; 9:22-24; Mme
Hebrew 7:11-28; 8:1, 2
ỌYỌHỌ UKPEP-ŃKPỌ 84
Eke Mkparawa

IKỌ IBUOT: “Koro etiñ ebaña Enye ete, Afo edi oku ke nsinsi, Nte utọ Melchizedek asañade” (Mme Hebrew 7:17).

Ufọn Ndiyom Esine-Ufọt

Oto ke emi Abasi edide edisana, owo onyũn ọyọhọde ye idiọk-ńkpọ, ke ediwak ini ana nte eyom esine ufọt, owo emi edidade ke ufọt edisana ido Abasi ye mme idiọk-ńkpọ nnyin ekpe ubọk ọnọ nnyin. Abasi اساسua idiọk-ńkpọ onyũn anam mbet: “ukpọñ eke anamde idiọk eyekpa mkpa” (Ezekiel 18:4). Edi Jesus ama onyime ndibiom ubiom-ikpe nnyin nnyũn mkpa ke ibuot nnyin. Enye ọkọduọk iyip Esie man nnyin ikpọbọ nsinsi utebe ikpe. Enye odu ke emi ke iso Abasi ndinam mkpe-ubọk nnọ owo ekededi eke oyomde erifen ke idiọk-ńkpọ esie. “Ndien edieke owo anamde idiọk-ńkpọ, nnyin imenyene Ekpe-emem ke ufọt nnyin ye Ete, kpa Jesus Christ, emi edide edinen” (I John 2:1).

Nnyin idikemeke ndisobo ye Abasi ke Heaven ye idiọk-ńkpọ ke esit nnyin. Ana nte nnyin ibọ erifen ke mme idiọk-ńkpọ nnyin mbemiso enye ekeme ndidara nnyin. Nnyin inyene nditiene Jesus, ikpe Enye ubọk ite efen mme idiọk-ńkpọ nnyin onyũn eyet mmọ efep. Ndien ke Abasi okutde Iyip oro ke esit nnyin, Enye eyekeme ndise nnyin ke ima. Usuñ efen iduhe nnyin ndidi mbine Abasi. Jesus ama etiñ ke ini Enye okodude ke ererimbot ete “Owo baba kiet itieneke Ete, ibọhọke ebe ke Ami” (John 14:6). Enye okowut ete, ke edieke Jesus mifukke idiọk-ńkpọ nnyin ke Iyip Esie, Abasi ididaha nnyin nte nditọ Esie. Ke efende mme idiọk-ńkpọ nnyin, etebe nnyin ikpe ke iso Abasi, nnyin inamke aba idiọk-ńkpọ.

Iyip Ufene, Mbiet Jesus

Mme owo ema edu ke ererimbot ke mme tọsin isua mbemiso Jesus ekedi ndikpa ke ibuot mme idiọk owo. Didie ke ekpekeme ndinyaña mmọ? Ke eritọñ, Abasi ama enyene uduak ete ke mme owo ekeme ndiwot mme ufene ndien ke iyip oro ekeme ndifak mmọ. Iyip eke nyara enań ye eke ebọt ekedi mbiet Iyip Jesus emi ediduokde usen kiet man emen idiọk-ńkpọ efep.

Ke eyo mme ete nnyin ke mbuqtidem, mbemiso Israel ekabare edi idut, mme ibuot ke ufọk kiet kiet ekeda ke itie mme oku, enyũn ewa uwa ke idiọk-ńkpọ mmọ ye eke nditọ mmọ. Nnyin imokut nte Job ekesidemerede ke usenubọk ọfọp uwa ke ibuot nditọ esie, iren ye iban, ndusuk mmọ ema enam idiọk enyũn edot iyaresit Abasi (Job 1:5).

Mme Oku Israel, Mbiet Jesus

Ama ọsọñ Nditọ Israel idem ke eyo mmọ ndifiok uduak erifak owo emi Jesus ekedide ndinam ańwaña ke ini Enye edide ke isọñ, ke ntre, Abasi ọkọnọ Ibet emi ekesinede Ataya ye mbiet ye mme usọrọ edikpono Abasi, ye mme oku emi ekesidade usuñ ke mme edinam. Kpukpru ido ukpono oro ekedi mbukpọñ Jesus okonyuñ anyan ubọk owut se Enye edinamde ke Enye edide ke isọñ man akpa ke Calvary ndikpe ekọm-urua ufak nnyũn ndep mfọn Abasi nnọ nnyin.

Ke ini Jacob ekekperede ndikpa, ke ama akada ufọk esie oduke ke Egypt, enye ama okot nditọ esie duopeba man ọdiọñ mmọ; ndien enye etiñ nte ntiñ-nnim ikọ, ete ke akpan esie ididighe ibuot inọ nditọ Israel idinyuñ ifọpke uwa inọ mmọ eken. Ke ini iso, ke Israel ema ekenam idiọk ke ndinam eyen-enań o’gold nnyũn nnuhọ nnọ enye, esien Levi ema ekeda ke ńkañ Abasi, ndien ekedi ke esien emi ke ekemek Aaron ndidi ibuot ofuri idut ke ńkañ Abasi, ndinyuñ nnam ńkpọ nte akwa oku. Edi ufọk esie ekenyene ndinam utom ke itie oku.

Ebana Idem Enim Ke Itie Oku

Abasi ama ọnọ Moses uyo ete enam ndiye edisine ńkpọ enọ Aaron ye nditọ esie, man mmọ ekpesine ke mmọ edinamde utom ke edisana ebiet. Abasi ke Idemesie okowut nte ekimde mme ekura oro, emi ekedade gold, awawa, ye purple, ye ididuot ye eti linen enam, emi ńko ekedade mbufiok enam eye eti-eti. Mme edisine-ńkpọ emi ekedi eke “ubọñ ye uyai” ndien eyedada mmọ ebana mme oku ndinam utom ke iso Abasi ke Ataya.

Nnyin ke mfin, emi ima ikamana obufa idi mme oku inọ Abasi, ndien ediye edisine ńkpọ emi edade ebana nditọ Abasi edi mme edisine-ńkpọ edinen ido: “Enye emesine mi edisine-ńkpọ erinyaña ke idem, amada ekura edinen ido ofuk mi, kpa nte ọdọ-ńwan ayarade anyanya esiemọ, ye nte ńwan ndọ esinede ńkpọ mbana esie ke idem” (Isaiah 61:10).

Ke ini mme oku ema ekesine ndiye ọfọñ mmọ, akana nte ediọñ enyũn enam mmọ esana mbemiso mmọ ewa mme uwa ebaña otu owo. Otu owo ema edi ke Ataya ndise edinam emi edinamde Aaron ye nditọ esie edi edisana. Ke usen itiaba ke mmọ ekedu ke Ataya man enam se Abasi okoyomde mmọ enam. Mmọ ema eyere mmọñ enyũn eyere edisana aran ke idem ndien enam uwa enọ Abasi. Ayara enań edi se ekewotde ndida nsio isop idiọk-ńkpọ,

okukim erōñ ekedi eke edifōp uwa, okukim efen edi se ekedade eyōhō mmō ubōk. Aaron ye nditō esie edori ubōk mmō ke mme ufene emi, ndiwut ete ke mme ufene emi ekpa ke ibuot mmō.

Ediyak Idem Nnọ, Eke Nnyin

Kpukpru mme uwa emi edi se Abasi okonimde saña-saña, ndien akana ewa mmō ukem-ukem nte Abasi okōdōhōde, man Aaron ye nditō esie ekpekeme ndinam utom ke itie oku. Nnyin ikpokut emi nte isen edinam edieke anade nte nnyin isaña ibe ke oruk edinam ntem; edi ana nte nnyin inam mme ñkpọ ñko, man enam nnyin isana. Inaha nnyin iwa mme ufene, edi nnyin inyene ndida ikpōhidem nnyin inọ nte “odu uwem uwa, emi asanade emi onyuñ enemde Abasi ndibọ,” koro emi edide uwa eke anade ọnọ nnyin ndiwa (Ñwed Mbon Rome 12:1). Nnyin inyene ndikpeme nnyuñ ñkut ete ke nnyin imōnọ Abasi mme ñkpọ eke enemde enye ndibọ. Enye idinemke esit edieke nnyin iyakde idem inọ Abasi ke usuñ eke minenke. Nnyin inyene ndinọ Abasi se ifōnde ikan, inyuñ iñwōñō ndinam se ededi eke Enye oyomde nnyin inam.

Ke ebede eriyere aran, mme oku ekenyene ndiyet iyip ke utōñ nnasia ye ke akpan nnuen ukot nnasia mmō. Emi okowut ete ke iyip ama ofuk mmō ofuri ofuri. Ke emi nnyin ikpep ite ke ana eda iyip esin ke esit nnyin oyōhō ikaba ke edinam asana, ke nnyin ima ikakabare idi “mme oku” mme ke ema ekenyaña nnyin.

Ikañ Eke Abasi

Mme oku ekesidu ke Ataya ke usen itiaba ke ini eriyak idem mmō nnọ Abasi. Ke oyōhō usen itiaita, mmō edu ke mbeñidem ndiwa mme uwa ke ibuot ofuri owo. Abasi ekesinọ ikañ edita uwa ke itie uwa ndiwut ete ke utom ye eriyakidem nnọ mme oku edat Enye esit. Idighe owo ndomo kiet ekesidomo ikañ. Abasi akam esinam ikañ asak ke unana idorenyin. Mme owo esidara ndikut nte Abasi odude ye mmō, emi esinam mmō eduōñọ ke isōñ etoro enye.

Ke iyomde edinam asana inyuñ iyakde idem inọ Abasi ke usuñ eke enemde Abasi esit, Enye esiyak ikañ spirit Esie oduọ ofuk uwa nnyin, ndien nnyin ifiok ite ke eyet esit nnyin asana. Ke emi, akamba eridiōñ ke ebet nnyin ke uduok mmōñ Edisana Spirit, ke ini enọde owo emi ema ekeyet asana odudu ndida nnam utom.

Ikañ emi Abasi okodomode ekenyene ndika iso nsak ke itie uwa ofuri ini. Ke kpukpru usen-ubok ye okoneyo, ekenyene ndidori mbufa ñkpọ uwa do, ke esiode mme saña-saña uwa efep. Ke ntre ke nnyin inam ikañ ima Abasi asak ke esit nnyin ke iwade uwa ima ye utom edinyime esit inọ Andikoñ-ñkan.

Akwa Oku Nnyin

Mme oku eken kpukpru, ema enyene mme iso utom, edi mmō ekediana kiet ke edinam ye akwa oku, emi ekedide andida mmō usuñ. Ama onyuñ odu mme ñkpọ emi akwa oku ekedinamde ikpōñ. Nnyin idi mme anam-utom ọtọ kiet ye Christ, Akwa Oku nnyin, ke isuk isuande etop Erinyaña. Jesus edi ibuot Ufok Abasi, edi Enye ikpōñ ekeme ndinyaña mme anditak.

Nnyin ikpep ite ke Jesus ekedi oto ke ubon Judah, “ndien akanam Moses itiñke baba ñkpọ kiet eke abañade oku idian esien emi” (Mme Hebrew 7:14). Didie ke Enye edi oku edieke mme oku eketode ubon Levi?

Oku emi okokponde akan Aaron ama odu ini kiet. Enye ekedi oku ke ini Abraham. (Nnyin imeti ite ke Abraham ekedi ete-ete Jacob, ndien okoto ke eyen Jacob, Levi, Aaron ye idaha oku esie ọworo odu). Oku emi ekedi Melchisedec, ndien ekekot enye edidem Salem. Ke Jesus ekedide, ikanaha Enye oto ke ubon Aaron, edi ekedi oku utọ eke Melchisedec emi ñko okonyuñ edide edidem. Jesus eyedi Edidem ke ini Enye afiakde edi ndida ubōñ ke isōñ ke ini Ukara Tōsin Isua.

Abraham ekedi akwa owo, owo Abasi, emi ekotde ete mbuotidem. Mme Scribe ye mme Pharisee eketiñ ebaña enye nte ete mmō, enyuñ eda enye nte anditōñọ ido ukpono Abasi mmō. Edi usen kiet, nte enye okonyōñde ekōñ ye ediwak ñkpọ mbume ekōñ, enye ama osobo ye Melchisedec, ndien ke okutde ete ke enye okpon akan imọ, Abraham ama ekpe oyōhō mbak ñkpọ duop ọnọ enye. Melchisedec ke ndo-ndo oro ama ọdiōñ Abraham. Paul etiñ ọnọ nnyin ete ke andikpri esikpe oyōhō ubak ñkpọ duop ọnọ enye emi okponde akan enye, enye oro onyuñ ọdiōñ enye; ke ntem nnyin imotim ikut ite ke Melchisedec ama okpon akan utibe owo Abasi emi, Abraham.

Christ, Oku Nte Melchisedec

Melchisedec ekedi mbiet Jesus, ke ntre edieke Melchisedec okokponde akan Abraham, ana nte Jesus edi andikpon ñkan Abraham. Mme Scribe ye mme Pharisee ikoyomke ndikpañ utōñ nnọ Jesus, eketiñ ete ke mme imọ imenyene Abraham ke ete. Edi Jesus etiñ ete, “Abraham ama adara ndikut usen mi.” Kpukpru mme anditiñ ntiñ-nnim ikọ eke Akani Ediomu ekewuk enyin ese ye idaresit oruk ini eke Jesus edidide, ndien owo idiyomke mme oku oruk eke Aaron.

Nnyin imeti ukpep-ñkpọ eke abañade Ataya, nte iso Abasi okodude ke ufot mme cherubim ke enyōñ ñkpọ-itie mbom ke Ata Edisana Ebiet. Akwa oku ikpōñ ekenyene ndiduk ubet oro, mkpasip ini kiet ke isua. Edi ke ini Jesus ekedide ke isōñ, nditō Israel ema efiak edem ekpōñ Abasi anyan usuñ esim nte iso Abasi mikoduhe ke Ata Edisana Ebiet aba. Ke ini Jesus akakpade ke krọs, ikpehe temple emi okodipde Ata Edisana Ebiet ama asiaha tōñọ ke enyōñ osim isōñ ndien owo ekededi ama ekeme ndibe nduk ke esit. Ini edikpono Abasi ke Ataya ye eke temple ama ebe efep. Jesus ekedi obufa Akwa Oku, ndien enye ikanaha awa mme ufene ke Temple kpukpru usen, koro Enye akawa

Idemesie ini kiet, okonyuñ ọduọk Iyip Esie man ọnọ ufak eke ebighide ke nsinsi; ndien ye Iyip Esie, Enye ebe oduk ke Heaven.

Eyet Christ Aran Enim Nte Oku

Christ ikakabakere idi oku koro Enye okoyomde ndidi ntre. Abasi ekemek Enye ukem nte Enye okokotde Aaron (Mme Hebrew 5:4). Ekeyet enye ke mmọñ enyuñ eyet Enye aran (Edisana Spirit) ke ini ekenimde Enye uduọk-mmọñ ke Jordan, ndien Spirit ama ọsuhọre nte ibiom odoro enye ke idem. Ndiyet Iyip ke utọñ, akpan nnuen-ubọk ye ukot mme oku edi se ikadade itie ke ini Jesus akayarade anyanya ñkukim, ekenyuñ ekọñde okpukwak ke ubọk ye ukot Esie ke krọs. Jesus ama anam mbiet idaha oku ọyọhọ, edi adaña didie ke enye okoñ akan mmọ eken!

Ke ini Isaiah okokutde Abasi ke ñkukut, enye ama okop nte mme cherubim efioride, “Edisana, edisana, edisana, Jehovah mme udim; ubọñ esie ke ọyọhọ ke ofuri ererimbot.” Isaiah ọbọrọ ete, “Enyin mi okutde edidem, Jehovah mme udim” (Isaiah 6:3, 5). Oro ekeke Jesus emi akabarede edi Akwa Oku nnyin. Ñko John, ke Isuo Patmos, ama okop nte mme Angel ekwọde: “Eyen erọñ emi ekewotde omodot ndibọ odudu, ye inyene, ye ifiọk, ye ukeme, ye ukpono, ye ubọñ, ye eridiọñ,” ndien kpukpru ñkpọ emi ekebotde, emi edude ke Heaven, ye ke isoñ, ye ke idak isoñ, ye ke inyañ, ye kpukpru ñkpọ eke edude mmọ ke esit ebọrọ ete, “Yak eridiọñ, ye ukpono, ye ubọñ, ye erikara ofuri ekondo, enyene Enye emi etiede ke ebekpo, enyuñ enyene Eyen-erọñ ke nsinsi-nsinsi” (Eriyarare 5:12, 13). Jesus, Akwa oku nnyin, akawa Idemesie nte Eyen-erọñ Abasi, man ọkponọ nnyin nsinsi uwem. Enye ke anam mkpe-ubọk ke emi ke iso Abasi ọnọ nnyin. Kpukpru owo eke edidide ye ñkabare esit, edinyuñ oyomde erifen ke mme idiọk-ñkpọ mmọ eyebọ utebe-ikpe ke iso Abasi ebe ke Iyip Jesus, ndien eyenyene nsinsi uwem.

MME MBUME

1. Nso idi ntak emi iyomde oku?
2. Anie edi Akwa Oku nnyin, didie ke idaha oku Esie ọfọn akan eke Aaron?
3. Mme oku eke ataya ekesisaña didie eda itie utom mmọ?
4. Nte Jesus okoto ke ubon Aaron? Itie oku Esie ekebiet eke anie?
5. Didie ke Jesus akafak nnyin osio ke idiọk-ñkpọ?